

Birdaexr Sul Vaexr Maele Ber

1

¹ Ngo mel Yisu Zidu leil visser su nei yar miardal dae ca Ximexr Birdaexr a. Ngo nia leil xil vaexr gger. Niul ddei Arbosobo hherdder niul leil jiuxlsu Yisu Zidu mel nixmox seir gaxzi, yel nia ngua sael a Yisu leil ddarzzi a. Eil ddei mel zoxlyoxlyoxl ddei nga a.

² Nia Arbosobo nei niul ddei Seirpor Yisu leil saexl dax a, yaa nia leil cirza-hanga lei daxlgaxl-daxllixl meixl gger lol nia, nixmox zzar yarzi sael zzaso lol nia!

Ho Bei Ho Yisu Leil Ddarzzi Dax

³ Arbosobo mel vaer zzir ddei nga a; seirceix-seirmaer ddei nga a; yel yar niul leil tiur teixl lei a, yar ddei cassor-worssor bei lol. Niul yar leil saexl a, yar ddoddomo bei a, niul leil cirza-hanga sser zoxr mel gger, niul leil zuixl nr bei lol, cirse-cirsil gol dae lol. ⁴ Arbosobo eine bei a mel, yar dder yar bbeix har zaxr goxr yarzi zoxlzoxl yarzi naxrcixl hal mel niul leil gger a, niul leil middurbbor ca mel nr seir xiar dae mel nr bei ssi lol, niul leil yar sael a seirceix-seirmaer lol.

⁵ Yel nia zabbar seirseir a Yisu leil ddarzzi doxr dae nia. Yisu leil ddarzzi dae ho a lei, nia yoxl ho bei ho seirseir bei dax nia; seirseir bei dae ho a lei, nia yoxl ho bei ho cirza-hanga saexl dax nia; ⁶ cirza-hanga saexl dae ho a lei, nia yoxl ho bei ho armael leil guaxr ssei xie dax nia; armael leil guaxr ssei xie dae ho a lei, nia yoxl ho bei ho ssertexr zza dax nia; ssertexr zza dae ho a lei, nia yoxl ho bei ho Arbosobo dax bei mae dae nia; ⁷ Arbosobo dax bei mae dae ho a lei, nia yoxl ho bei ho arzzi-nimar arzzi-nimo leil perniar dax nia; arzzi-nimar arzzi-nimo leil perniar dae ho a lei, nia yoxl ho bei ho cassor-worssor mel leil perniar

dax nia. ⁸ Nia zoxlzoxl a eil mel sael a bei doxr dae arddeirnga a, nia dder niul ddei Seirpor Yisu Zidu leil saexl dax a; yel nia yar ddei miar bei a lei bei cexr var. ⁹ Nael eil mel sael a nr bei su ca hal mel mel dder mia nr xie bbeixsael naer ggie lar mia xie ca hal mel sael a nga. Yaa mel yaa ddei zuixl mel leil ssoxrsuxl ho a lei hol-nr-cir a.

¹⁰ Nael arzzi-nimar arzzi-nimo mel, nia gielgiel zabbar seilseir a eil mel sael a bei doxr dae nia. Eine nga a mel Arbosobo nia leil tiur teixl lei saexl ddo a. Nia eil mel sael a bei doxr dae a mel, arddolcar ci lei nia dder de zei nr var, hherdder Arbosobo leil ddar-nr-zzi bei nr var. ¹¹ Eine nga a mel, nia dder niul ddei Seirpor, hherdder niul leil jiuxlsu Seirpor Yisu Zidu ddei goxr gga ddir wo ddo. Yar ddei goxr ddei mel, cirse-cirsil lei zza doxr dae.

Arbosobo Ddei Sul Ber Gga Xiezi Mel Ddei Ddar

¹² Yel nia eil mel saexl ho a; halae Arbosobo ddei ddarzi mel leil velper a ddarzzi dae ho a bbeixarnar, nael ngo halae cirleixr nr nor eil mel nia leil bbeix gger doxr nia. ¹³ Ngo zzir dae a, ngo gol dae seir hozze mel, ngo dder nia leil eil mel leil holcir doxr dae lol nia. ¹⁴ Ngo saexl, hormo arleixr nr nga ngo dder si du a. Eil mel mel niul ddei Seirpor Yisu Zidu ngo leil bbeix gger a. ¹⁵ Nael ngo arsae bei no kor bei a, ngo si ho a lei, nia leil zoxlzoxl a eil mel holcir doxr dae lol nia.

¹⁶ Ngua nia leil biar gger dae Seirpor Yisu Zidu ddoddomo bei dae nei yar zeixleixr jjixr lei eil mel, ngua nrbba nrbba gurlir biar dae mel dax zox dae a biar teixl lei nr nga. Ngua mel malmal yar bbobbolbbo yarzi quexrlixl zza mia goxr a. ¹⁷ Arbbor Arbosobo ca mel leil Yisu leil i du lol nei yar leil middux lol car a mel, ngua lei yar dax cirgo a hher dae. Halcar a mel, mu zzir ggie hher dae bbobbolbbo zza Arbosobo ddei yar leil bbeix: “Eil ddei mel ngo perniar dae Ssorzil-ssorya ddei nga a. Yar bei dae mel ngo dax yarzi nixloxdda,” eine bbeix a. ¹⁸ Ngua yar dax cirgo

a Arbosobo ddei worga leil hher dae car malmal, merlabbor bbeix teixl lei qiurte eil ddei leil bbejjiur a.

¹⁹ Eine nga a, ngua gielgiel xiezi mel arddolcar a arsae lerler nga var bbeix har zaxr goxr mel leil yarzi sael ddarzzi a. Yaa bbeix har zaxr goxr eil mel mel hherdder de ar zar a neixmar ggie doxl dae sael a nga. Yel nia lei yaa bbeix har zaxr goxr mel leil zabbar seilseir a holcir dae nia, hherdder merteir du a, ddux lei gie hal taex nia nixmox ddei leil bbele lol hal cir ni zzezze ci. ²⁰⁻²¹ Arddolcar a arsae lerler nga var bbeix har zaxr dae mel mel ca mel nixmox zzar xiar dae a bbeix har zaxr nr nga a nei, Arbosobo ddei Xiu ddei xiezi mel nixmox zzar hher ji dae a, yaa Arbosobo xiar dae mel bbeix teixl lei arddeir a. Yel nia holcir dae nia, zoxlyoxl zzir ddei mel dder Arbosobo Ddei Sul ber leil arsae lerler nga var bbeix har zaxr dae hazza lei, xiezi mel armael xiar dae a bbeix teixl lei eine bbeix nr ddo.^a

2

Sulmulsu Yarjiar

¹ Halleix ca mel gga mel xiezi yarjiar armel ddux lei goxr a. Arddolcar a, nia dax lei sulmulsu yarjiar armel ddux lei var. Yaa mel arjjiuljjiu-arla nga-nr-zi hal mel ca leil mul gger. Yaa mul gger dae eil mel mel ca leil Arbosobo dax bbe kae lol var. Sulmulsu yarjiar eil mel ca leil jiuxlsu Seirpor ddei leil lei nr ssexl. Yaa mel cirleixr dder armael ddei armael leil ke zil gger a. ² Nael ca cirke a mel halae yaa ggecir ddei nr seir bei dae eil mel dax bei mae ssi, yel kebal ca mel leil Arbosobo ddei ddarzi mel leil

^a**1:20-21** *xiezi mel armael xiar dae a bbeix teixl lei eine bbeix nr ddo* Ca cirmelmel a zzir dae ddar eil qier ddei yilsi meldder “nia armael xiar dae mel dax zox dae a azo yilsi zza bbeix nr ddo.”

bbeix vuxryixr lol. ³ Sulmulstu yarjiar eil mel mel cirza-hanga tuxr a, nga-nr-zi hal mel nia leil biar gger a, nia dax zzirbae li niazzir. Arbosobo mel halleix tortor dder yaa leil faxr niazzir dae ho a; yel yaa pato ddo piar a zzir lei zzir nr ssa.

⁴ Arbosobo zuixl bei su tisir mel leil lei ssoxr-nr-suxl, yaa leil dixlyuxl gga piar ji gger, neixmar ggie ge ji dae, yaa Arbosobo leil xia dae a, arddolcar a yaa leil ser. ⁵ Arbosobo lei Noxryal dax cirter a ca hal coxr leil ssoxr-nr-suxl, yar worpe-vilax pe lol a, yar dax bei nr mae su ca mel leil niuxlzil lol. Nael yar Noxryal leil nei yar ddei ake ca sirler leil jiuxl a. Noxryal mel ca mel leil hoxrhoxr bei nia biar gger ssi su ar ddei a.

⁶ Halae Arbosobo Sordomar zzi nei Exrmoxrla zzi leil faxr a, merlabbor adoxl zeil lei lol a, zzi eil nnel cu pixl gger a. Yel eilni-arggeni ca hal mel leil eil mel sael a yar dax bei nr mae bei nr ddo saexl lol. ⁷ Loxrdaexr mi ca hal ddei mel cirni-cirni Lixlfaxr dax bei nr mae su mel dax cirgo a hher dae. Yaa yarzi gexrddo bei nr sir bei dae mel leil mia a yar yarzi sael cix, yel Arbosobo dder ca seir Loxrdaexr leil jiuxl a. ⁸ Ca seir eil ddei mel yaa dax cirgo a hher dae, bbecir-bbeni lei yaa bei nr sir mel bei^b ggie mia dae nei bbejjiur dae, yel yar nixmox zzar yarzi zzasol. ⁹⁻¹⁰ Eine nga a, Arbosobo dax bei mae dae su ca mel leil yaa leil sixr i dae mel gga arsae jiuxl teixl lei nia mel Seirpor saexl; Arbosobo dax bei nr mae dae su ca mel leil arsae faxr nia lei Seirpor saexl, hherdder nixixl maelele hal cir ni zzeze faxr ci. Armael ggecir ddei azo nr seir bei niazzir dder azo bei ssi su mel nei quexrlixl zza su mel leil i zeil su ca mel gielgiel eil mel sael a nga var.

Sulumstu yarjiar eil mel mel arsae bei niazzir dder arsae bei, arseir dax lei gexr nr saexl, yaa merlabbor gga bbobolbbo zza su mel leil bbeix

^b2:8 *yaa bei nr sir mel bei* Ca eil mel Arbosobo ddei Lixlfaxr dax bei nr mae.

vuxryixr. ¹¹ Nael tisir mel bir yaa leil ddo, bir yaa leil bbesur zza bbeixarnar a, halae bbeix vuxryixr dae ddar mel sser a, Seirpor dax yaa leil nr goxl. ¹² Nael ca eil mel mel armael nr saexl dae hal mel leil lei bbeix vuxryixr. Yaa xiu nr zza cinil sael a nga, azo lei xiar nr saexl, yaa leil xiu teixl lei a mel hherdder ssu si a seixl zil labox sael a nga. Arddolcar a, yaa cinil sael a si nia.

¹³ Yaa arsae si leil ke mel, si leil yaa leil arsae ke xixl. Yaa cirza-hanga nr seir bei meixr, daxmeix bei dae a lei seixlda lei nr saexl. Yaa bei dae eil mel mel hherdder pia piu leil naexggiexrggiexr niar dae mel sael a nga. Yaa nia dax cirgo a zzo zzor a lei, halae yaa cafur-calel hal zzu leil biar meixr. ¹⁴ Yaa meixddur pu du lei a dder kerjiaer ssi niazzir, yaa zuixl nr bei nixixl lei arleixr nr zza. Yaa yoxl bar-nr-ver ca hal mel leil fur a zuixl bei ssi lol. Yaa nixmox zzar mel cirza-hanga lei tuxr. Yaa hherdder Arbosobo faxr dae ca hal mel nga a. ¹⁵ Yaa Arbosobo yaa leil ssi lol jjiumo zex leil nr ssi, jjiumo ssi coxr doxr. Yaa ssi dae jjiumo zex mel dder Biraer ddei ssor Balaxr mi ca hal ddei ssi goxr zex nga a. Balaxr mel hherdder zzirbae sei-nr-beix tuxr xiezi hal ddei nga a. ¹⁶ Yar zuixl bei a, yar zzaer dae ddar te nr var tarlodaex ddei lei, ca sael a ddar te teixl lei a yar leil hie a; yar leil yar nrbba nrbba bei ssi niazzir dae mel nr bei ssi lol.

¹⁷ Ca eil mel mel hherdder ajjix ddux lei nr var lur mel sael a nga. Almer zi dae lei yoxl mersi jia kae gger hal mel sael a nga. Arbosobo yaa leil dixlyuxl gga neixmar ggie halmaex hher ggie ar ddei bei dol gger dae ho a. ¹⁸ Yaa mel yarzi olvaer, ddar te a lei armael leil kuar doxr lalnga. Yaa, jiajia Yisu leil ddarzzi a, zuixl bei su ca mel dax bbe kae a nga seir ca hal mel leil fur. Yaa ca hal mel leil armael xiar dae mel dax zox dae a, capor ssormaer buxlguaer-laxlsixr bei ssi lol. ¹⁹ Nael ca mel arddolyox leil armael leil guaxr lol mel, hherdder arddolyox ddei zebol nga a. Yel yaa

meir ddei zzae bbeix ca mel leil armael lozza lol, nael yaa armael zzae zuixl ddei zebol mu ssi. ²⁰ Ca mel niul leil Jiuxlsu Seirpor Yisu Zidu leil saexl ho a; yaa Arbosobo leil nr saexl su mel nr seir bei dae hal mel sael a nr bei a; nael giedae yoxl bei jjixr halae zuixl ddei yaa leil guaxr gex dae lol arddeirnga a, maelele ci a yaa bir halleix leil gexrddo. ²¹ Yaa mel Arbosobo yaa leil bei lol dae mel leil saexl ho a; nael yaa halae Arbosobo miardal dae seirceix-seirmaer hal mel dax bei nr mae, yel yaa nr saexl arddeirnga a halae bir eil mel leil seir. ²² Ddarbel-ddarqiar bbeix: anol mel yar peixl teixl lei mel, yar yoxl zzor ji xixl. Veixrmodo mel leil cir xia gger ho a, yar yoxl nilnaexlbix gga guir ssi. Ddar eil mel yarzi bbeix hoxr; ca hal mel lei dder eil mel sael a nga.

3

Seirpor Jjixr Lei Nixixl

¹ Ngo perniar dae arzzi-nimar arzzi-nimo mel, eilcar a ngo nia leil xil nr fo ddei vaexr gger dae a. Ngo xil nr fo jjia gga lei nia leil eil mel biar gger a, nia leil holcir dae lol, nia leil nixmox zzar seirseir mel lar xiar lol. ² Nia leil Arbosobo ddei xiezi mel halleix bbeix goxr ddar mel holcir dae lol. Halae niul leil Jiuxlsu Seirpor miardal dae ddar mel leil holcir dae lol. Ddar eil mel mel Seirpor miardal dae ca mel biar teixl lei arddeir a.

³ Arsaebeilei nia zoxlyoxlyoxl ddei leil saexl nia. Nixixl maelele ddei gga mel, ca cirmelmel a arsae bei niazzir dder arsae bei. Yaa mel ddarcixl-ddartaex te a, nia leil vaessi a bbeix: ⁴ “Yisu doxl bbeix, yar zeixleixr jjixr lei nia bbeix har zaxr goxr a mar! Yar arddol jjixr lei dae? Niul ddei porpor mel lei si ho a; middurbbor cirza-hanga mel halae coxl beil halleix dax ciryoxxr a nga nor!” eine bbeix a. ⁵ Nael azo lei nr zza seir halcar a, Arbosobo ddar ar qier bbeix a qie, merlabbor ddei lei zza. Yar middurbbor ajjix mel cirgo a hher dae lol a middur ddei dder ddux lei a.

Yaa dexryixl eil mel hol-nr-cir. ⁶ Halleix middurbbor ddei mel Arbosobo worpe-vilax pe lol a, pe xiaxr gger a. ⁷ Eilleix merlabbor middurbbor ddei mel Arbosobo bbeix dae ddar qier leil koxl dae a zza doxr dae. Yel Arbosobo yar dax bei nr mae su ca mel leil faxr lei a, yaa leil mier lol hal cir ni zzeze zza ci a, adoxl sser a cu pixl gger du a.

⁸ Nael ngo perniar dae arzzi-nimar arzzi-nimo mel nia holcir dae nia: Seirpor dax bbeix ci a mel, cirdu koxl ddei lei dder cir ni sael a nga; cir ni ddei lei yoxl cirdu koxl sael a nga. ⁹ Seirpor mel ca mel xiar dae mel sael a hormo nixixl loxr a lei, yar bbeix har zaxr goxr mel sael a nr bei nr nga a nei, yar mel ca cir ddei leil lei dixlyuxl gga ssi lol nia-nr-zzir, ca cirddeir-hanga leil lei huixrsoxr lol a, yaa leil jiuxl wo lol niazzir. Yel yar dder nia leil xia doxr dae arddeir a.

¹⁰ Nael Seirpor jjixr lei hal cir ni mel hherdder zzaexpor mel zzaegu ker lei sael a nga; arseir lei yar arddolcar lei saexl nr var. Hal cir ni ci a, qiurte vaervaermo ar ddei me dae a qie, merlabbor ddei mier a; halae adoxl herhelher bbiu dae a, mia ddo nei mox dae ddo cirza-hanga mel leil lei cu pixl gger a; middur nei middur leil zza dae hazza-hamaer leil lei cu pixl gger a.

¹¹ Eil mel cirza-hanga lei mier var mel, nia ca mu a, arsaе mu nia neil? Nia nixixl goxr a, zuixl bei ssi nr ddo seirceix-seirmaer nga nia; Arbosobo dax bei mae dae nia. ¹² Yel Arbosobo leil xia dae a, yar leil nialngasael jjixr lei lol. Yar jjixr lei hal cir ni ci a mel, adoxl herhelher bbiu dae a, merlabbor ddei lei cu pixl gger a; mia ddo mox dae ddo cirza-hanga mel leil lei cu pixl gger a. ¹³ Nael Arbosobo mel niul leil mersixl-misixl ar ddei gger nia bbeix har zaxr goxr a. Eil ddei mel hherdder niul li wo loxia dae ddei nga a. Halmaex gga mel nr hoxr lei ardoxr nr zza a.

¹⁴ Yel ngo perniar dae arzzi-nimar arzzi-nimo mel, nia nixixl hal cir ni

leil goxr ci loxia dae a mel, nia dder arsae bei var arsae bei a armael leil nixmox seibeix lol nia, botaddu zza lol nr ddo, Arbosobo dax seir xixl nia.

¹⁵ Seirpor halae nr jjixr lei a mel, yar nia leil jiuxl wo lol niazzir a nga arddeir a; nia eine xiar nia. Hherdder Arbosobo niul perniar dae Barloxr leil olnolddu lol a, yar nia leil xil vaexr gger a, nia leil quex dae mel sael a nga. ¹⁶ Yar xil vaexr dae cirfo-hanga gga lei eil mel leil biar. Yar vaexr dae xil mel gga, cirmelmel a yarzi noni wo sol, yel sul nr saexl bar-nr-ver su ca hal mel mel, buxlguaxr-laxlsixr arddolyox yilsi zza eine biar. Hherdder yaa Arbosobo ddei kebal ddar hal mel buxlguaxr-laxlsixr arddolyox yilsi zza biar mel sael a nga. Yaa eine bei a mel, armael ddei armael leil dixlyuxl gga ssi lol lalnga.

¹⁷ Yel ngo perniar dae arzzi-nimar arzzi-nimo mel, nia arddolcar a arsae lerler nga var saexl ho a; nia fadae nia. Nr nga a, lixfaxr dax bei nr mae su ca mel, nga-nr-zi hal mel nia leil mul gger a, nia leil Yisu Zidu leil velper a ddar-nr-zzi lol var. ¹⁸ Nael nia ho bei ho niul leil Jiuxlsu Seirpor Yisu Zidu nia leil seirseir meixl gger dae mel leil saexl dax nia, ho bei ho yar leil saexl dax nia. Eilcar cirdae a, cirse-cirsil lei yar leil middux lol nia. Amae!